




# **Акафист преподобному Симеону Псково- Печерскому**

СТ  
ЫЙ  
ПРЕ  
ПОДОБ  
НЫЙ

СН  
МЕ  
ОНЗ  
ПСКОВ  
ПЯЕР



## **Кондак 1**

Избранный подвижнике иноческаго делания и молитвеннике о нас изрядный, преподобне отче наш Симеоне, равноангельному житию от юности твоея возревновал еси и, во обитель Печерскую вселившись, в простоте и смирении евангельски подвизался еси, темже, обилием благодати от Господа исполненный, от всяких бед и скорбей свободы поющих ти:

Радуйся, преподобне Симеоне, Псково-Печерский чудотворче.

## **Икос 1**

Ангельския чистоты стяжателю, отче Симеоне, подвигом монашеским добре украсившись, райския сладости причастник явился еси, темже и обитель твоя, в нейже Пресвятую Богородицу в молитвах боголепно воспевал еси, ныне о тебе красуется, приносящи ти таковая:

Радуйся, нравы ангельскими издетска украшенный;

Радуйся, обычаи благими зело удобренный.

Радуйся, путь Христов от юности возлюбивый;

Радуйся, чистоту телесную Тому сохранивший.

Радуйся, кротостию и смирением сердце твое умягчивый;

Радуйся, у пещер Богом зданных добродетельми просвещенный.

Радуйся, иноческаго жития богомудрый наставниче;

Радуйся, о всех к тебе взывающих теплый молитвенниче.

Радуйся, преподобне Симеоне, Псково-Печерский чудотворче.

## **Кондак 2**

Вида душу твою, издетска подвига желанием Христа ради исполненну, Подвигоположник Господь воспламени ю ко иноческому житию стремлением; ты же, блаженне Симеоне, отрок сый, преподобному Серафиму Саровскому в усердии отай подражал еси, чистыми усты в умилении вознося Богу: Аллилуиа.

## **Икос 2**

Разумея вся преходящая мира дольняго, ум свой к горнему восперил еси, и, вся житейская и суетная любве ради ко Господу оставивый, во обитель древнюю Псково-Печерскую, юже измлада зело возлюби, яко к тихому пристанищу притекл еси, да Богу единому поживеши. Сего ради, избранниче Божий, прими от сердца тебе приносимая:

Радуйся, к подвижничеству сердце твое склонивый;

Радуйся, всего себе воли Божией покоривый.

Радуйся, яко молитве и послушанию издетска навыкл еси;

Радуйся, яко во отрочестве старец велий наречен был еси.

Радуйся, мирския сладости яко огня бежавый;

Радуйся, монашескаго жития узкий путь избравый.

Радуйся, воздержанием благоукрашенный;

Радуйся, Духа Святаго благодатию осиянный.

Радуйся, преподобне Симеоне, Псково-Печерский чудотворче.

### **Кондак 3**

Силою божественною укрепляемый, отче Симеоне, в послушании ко игумену и братии кротко и смиренно душу твою хранил еси, празднословия всякаго удаляясь, и, труды к трудом неленостно прилагая, чина монашескаго достойна быти показался еси, в подвизах духовных всегда поя Богу: Аллилуиа.

### **Икос 3**

Имея ум свой к Богу вознесенный, от силы в силу восходил еси, отче Симеоне, и, благодать священства восприим, молитвою и постом по чреслам препоясався, яко раб благий, во всяцем деле духом твоим бодрствовал еси, единого ко спасению взыскупа. Мы же, таковую ревность твою прославляюще, приносим ти сицевая:

Радуйся, благоуветием и незлобием исполненный;

Радуйся, в братолюбии делателю прилежный.

Радуйся, чина ангельскаго достойный носителю;

Радуйся, обетов иноческих непреложный рачителю.

Радуйся, во трудех неленостный послушнике;

Радуйся, пред очима Господа усердный постниче.

Радуйся, целомудрия и чистоты хранителю;

Радуйся, нивы Христовы изрядный возделывателю.

Радуйся, преподобне Симеоне, Псково-Печерский чудотворче.

### **Кондак 4**

Бурю страстей воздержанием и любовию ко Христу умертвив, вящшаго подвига возжелел еси, богоблаженне Симеоне, темже, кротко пред владыкою представ, иже ты наместника обители видети желаше, по смирению сего отрелкся еси, и, схимую облекийся, в келию пещерную водворился еси, да тамо уединенно вопиеша Богу: Аллилуиа.

### **Икос 4**

Слышавше молитвы твоя, преподобне Симеоне, яже к Богу от сердца возносимыя, полчища бесовстии зело стужаху ти, устрашити и изгнати тя хотяще, ты же, яко воин Царя Небеснаго, силою креста Господня сатанину детель отражал еси, подвиги твоя усугубляя. Отжени и от

нас, отче благодатне, всякаго врага и супостата, да поем тебе сице:

Радуйся, в схиму, яко в броню ратную одлекийся;

Радуйся, молитвою, яко воин мечем вооруживыйся.

Радуйся, постом и воздержанием плоть духови покоривый;

Радуйся, иго Христова, яко благо, на ся подъявый.

Радуйся, демонов твердый устрашителю;

Радуйся, бесовских прилогов разорителю.

Радуйся, воины русския от враг в пещерах сокрывый;

Радуйся, молитвенным стоянием от погубления обитель избавивый.

Радуйся, преподобне Симеоне, Псково-Печерский чудотворче.

### **Кондак 5**

Богоблагодатна старца показа тя всемилостивый Господь верным, во святей обители яко крин сельный процветшаго; ты бо, отче Симеоне, чудес многих сосуде преизливаемый, вся скорбящая и страждущия любовию о Христе Господе утешал еси, призывая единомысленно пети всех Творцу: Аллилуиа.

### **Икос 5**

Видяще тя людие, пастыря добраго и крепкаго пред Богом молитвенника, дары Духа Святаго преисполненна, во множестве прихождаху к ти, в болезнех и скорбех изнемогающии, в ожесточении сущии и страждущии от дух нечистых, и, по прошению своему приемлюще, благодарственно тебе взываху:

Радуйся, любовь неложную ко всем явивый;

Радуйся, милосердию Христову подражавый.

Радуйся, пастырю добрый и любвеобильный;

Радуйся, отче, к страждущим благосердный.

Радуйся, о земли неплодной втайне нощию молитву творивый;

Радуйся, темже неплодие тоя в велие плодоносие претворивый.

Радуйся, чистым сердцем дар прозрения от Господа стяжавый;

Радуйся, игумена обители патриаршество предзревый.

Радуйся, преподобне Симеоне, Псково-Печерский чудотворче.

### **Кондак 6**

Проповедник милосердия христианскаго воистинну показался еси, преподобне Симеоне, и,

образ быв честнаго иночества, радостию о Господе исполненный мирен дух и велию любовь к творению Его стяжал еси, еже есть радоватися с радующимися и плакати с плачущими. Сего ради братолюбие твое поминающе, вознесем Богу: Аллилуиа.

### **Икос 6**

Возсиял еси во обители Печерстей яко светильник лучезарный, богомудре Симеоне, любовию нелицемерною души отчаянныя на путь ко Христу возставляяй, верою несумненною грехми помраченныя ко дверем покаяния приводяй и надеждою неизсякаемою благое терпение в напастех подаваяй. Мы же, молитвами твоими сохраняеми, ублажаем тя тако:

Радуйся, грешных пред Богом ходатаю;

Радуйся, Слова Божия в сердца наша сеятелю.

Радуйся, отчаянныя от смерти вольныя отвращаяй;

Радуйся, верныя от напрасныя смерти спасаай.

Радуйся, страждущим тепле сострадавый;

Радуйся, от бесов стужаемыя именем Христовым свободявый.

Радуйся, от напастей предлежащих скорый избавителю;

Радуйся, благочестия верных мудрый учителю.

Радуйся, преподобне Симеоне, Псково-Печерский чудотворче.

### **Кондак 7**

Хотяй от единого Бога милости снискати, предивне Симеоне, людския славы смиренно удалялся еси, благодать дарованную ти от Господа таяй, и тако в труде неустанным на служение ближним и обители твоей по вся дни до скончания благоплодно подвизался еси, за вся слава и вознося Богу: Аллилуиа.

### **Икос 7**

Новую купель Силоамскую в земли Печерстей, явльшуюся по неизреченней милости Божией, вернии обретоша, ибо благодатию, по вере ти данною, чудеса евангельская творил еси, отче Симеоне, егда жены кровоточивыя от лет многих ток устави еси и отроку ушеса и уста затворенныя отверзл еси. Мы же, имя Христово о толиком зело прославляюще, восхваляем тя глаголы таковыми:

Радуйся, Божия благодати смиренный таинниче;

Радуйся, судеб Божиих пречудный тайновидче.

Радуйся, сокровенная человеков яко в книзе зревый;

Радуйся, многия души человеческия ко Господу приведый.

Радуйся, расслабленныя здравы сотворяяй;

Радуйся, глазами болезнующая исцеляяй.

Радуйся, руке и нозе недужных укрепляяй;

Радуйся, удрученныя от зубных болезни свободяяй.

Радуйся, преподобне Симеоне, Псково-Печерский чудотворче.

### **Кондак 8**

Странное и предивное чудо Небесных благодати видим о тебе, отче Симеоне, егда приближися время отшествия твоего, всю надежду на милость Божию и заступление Пречистыя Владычицы возложивый, яве Богородицу зрети сподобился еси, тебе рекшую: угодниче Мой, скоро возму тя. Темже, тихою радостию о Господе исполняяся, вознесл еси Ему: Аллилуиа.

### **Икос 8**

Весь быв образ послушания, якоже в житии твоем, тако и в преставлении ко Господу, богоблаженне Симеоне, егда час кончины твоея, духовно тобою провиденный, по прошению игумена, яко верный послушник, отложил еси, да не в праздник великий погребение твое случится. Мы же, дивящися таковому послушанию твоему, с любовию тепле глаголем ти:

Радуйся, в послушание Христоподрожательное неуклонно себе вдавый;

Радуйся, смиренномудрия истинный образ явивый.

Радуйся, Царицу Небесную немолчно славивый;

Радуйся, заступление Тоя себе стяжавый.

Радуйся, со Христом быти присно возжелевый;

Радуйся, плачем покаянным яко банею себе омывый.

Радуйся, чадолюбче, о стаде твоем без устали пекийся;

Радуйся, и по смерти попечением твоим ны не оставляяй.

Радуйся, преподобне Симеоне, Псково-Печерский чудотворче.

### **Кондак 9**

Всего себе на служение Богу и людем предал еси, святче Божий, сего ради, на одре предсмертном немощствуяй, последняя наставления, утешения и благословения, во еже любовь имети между собою, от пастырского сердца чадом твоим преподал еси, и тако, в мире от земных почив, в Небесных обители блаженно преселился еси; ныне же со Ангелы вопиеша Богу: Аллилуиа.

### **Икос 9**

Витии человечести недоумеют како исповести день пречудного погребения твоего, достославне Симеоне, егда от всякия веси и грады чада твоя духовная во обитель Печерскую абие собрани быша дивно, но и, по смерти твоя суца жива чтуще, приношаху ти словеса таковая:



Радуйся, звездо, путь живота честнаго нам указующая;

Радуйся, зарю, верою твоею души наша пробуждающая.

Радуйся, свете, любовью Христовою нас озаряй;

Радуйся, лучу, мрак греховный покаянием рассеявая.

Радуйся, реко исцелений тихоструйная;

Радуйся, лампадо в молитвах о нас неугасимая.

Радуйся, сосуде даров благодатных неизживаемый;

Радуйся, цвете благоухания Небеснаго исполненный.

Радуйся, преподобне Симеоне, Псково-Печерский чудотворче.

### **Кондак 10**

Спасения ради вечнаго души твоея, отче Симеоне, труды многи и болезни в терпении кротко понесл еси, о себе ничесоже когда возомнив, обаче, пред всеми ся умалаяй, в дерзновении пред Богом велик явился еси. Темже, славою увенчанный, в радость Господа вшел еси, и нас не остави молитвами твоими, да сподобимся с тобою купно воспети Богу: Аллилуиа.

### **Икос 10**

Стена ограждающая от всякаго зла был еси нам, отче Симеоне, и по смерти, якоже обещался еси, ны не оставляеши твоим заступлением и всем, с верою к тебе прибегающим, помощь неоскудную в многоцелебных мощех твоих подаеши. Тебе же, яко мощному о нас молитвеннику у Престола Всевышняго, хвалебная приносим:

Радуйся, тяготы чад твоих на себе понесый;

Радуйся, истинную любовь ко ближнему нам показуяй.

Радуйся, к тебе взывающих скорое услышание;

Радуйся, в печалех сущих присное утешение.

Радуйся, в помощи к нам неоскудеваяй;

Радуйся, в прошениях наших пред Богом ходатайствуяй.

Радуйся, чудесы многи от Господа прославленный;

Радуйся, подвижниче дарованьми благими исполненный.

Радуйся, преподобне Симеоне, Псково-Печерский чудотворче.

### **Кондак 11**

Пение всеумилненное приносим у раки мощей твоих, угодниче Божий Симеоне, во всяцей скорби и немощи человечестей к тебе прибегающе, яко воистинну вемы тя крепкаго в бедах помощника и теплаго ходатая за ны пред Господом, да, идеже ты еси, и нас быти сподоби

молитвами твоими, взывающих к Богу: Аллилуиа.

### **Икос 11**

Светло празднует Печерская обитель честную память твою, преподобне Симеоне, и, божественную благодать в цельботочных мощех твоих видяще, Бога дивнаго во святых Своих прославляет, и тебе, яко благому предстателю, радостне взывает:

Радуйся, яко во обители у пещер Богом зданных зело потрудился еси;

Радуйся, яко со святыми отцы Печерскими прославился еси.

Радуйся, монашествующих духовное радование;

Радуйся, верных присное веселие.

Радуйся, яко нестяжанием тленнаго души нетление обрел еси;

Радуйся, яко от мира преходящаго во обители вечныя преселился еси.

Радуйся, николиже тебе просящия помощь оставляяй;

Радуйся, и донныне благодатными дары чудодействуй.

Радуйся, преподобне Симеоне, Псково-Печерский чудотворче.

### **Кондак 12**

Благодать Божия, от честных мощей твоих обилием чудес преизливающаяся, днесь собра вся верныя, любовию тя почитающия и смиренным сердцем в молении к тебе припадающия, и тя усердно просящия: души наша к покаянию приведи, тела недужная исцели и всех нас молитвами твоими от всяких бед сохрани, да велегласно воспоем Богу: Аллилуиа.

### **Икос 12**

Поюще дивное твое житие, преподобне отче Симеоне, ублажаем труды твоя, в нихже неленостно по вся дни во обители подвизался еси, славим кротость и смирение твое, имиже Христу Богу подражал еси, превозносим любовь твою, еюже ближнему в нуждах добре послужил еси и величаем тя песнопеньми таковыми:

Радуйся, милостиве, Богом помилованный;

Радуйся, целомудре, от Христа славою увенчанный.

Радуйся, кротче, рай Небесный наследивый;

Радуйся, трудниче, покой блаженный обретый.

Радуйся, молитвенниче, со Ангелы жительствуяй;

Радуйся, постниче, благами вечными наслаждайся.

Радуйся, незлобиве, Бога зрети сподобивыйся;

Радуйся, боголюбче, Господом возлюбленный.

Радуйся, преподобне Симеоне, Псково-Печерский чудотворче.

### **Кондак 13**

О, святыи угодниче Божий, преподобне и богоносне отче наш Симеоне! Тебе молебно предстоящих не презри, но твоим мощным о нас заступлением помози богоугодно на земли пожити, да, очистившеся от всякия скверны, невечерний достигнем покой, идеже с тобою вкупе Всемилостивому и Человеколюбцу Богу воспоем ангельскую песнь: Аллилуиа, аллилуиа, аллилуиа.

*Сей кондак чтется трижды, затем Икос 1 и Кондак 1.*

### **Молитва**

О, всечестный и богоблаженный отче наш Симеоне! Приими ныне тебе с любовью и верою прилежно молящихся и сохрани нас от всякаго зла, дана бо тебе от Бога велия благодать: недужныя исцеляти, скорбящия утешати, в беду впавшия свободдати. Ты бо аще и миру себе умертвил еси, но, любовь Христову к людем являяи, нечужд их нуждам показался еси. Темже молим тя, буди нам заступник от враг спасения нашего, души наша, грехом уловенныя, к истинному покаянию приведи, телес наших болезни уврачуй, юныя благочестию научи, старыя поддержи, сирых и обездоленных препитай. Обитель убо твою, в нейже усердно многая лета подвизался еси, в мирном благоустроении и благолепии сохрани, и вся, яже монашествующия и добре труждающияся, во благих желаниих утверди и в подвизех иноческих укрепи. Ей, святыи отче, испроси нам у Премилостиваго Спаса коемуждо ко спасению благопотребная, да исправивше житие наше, от части шуия отлученни будем и вечное спасение во Царствии Небеснем молитвами твоими улучим, идеже с тобою и всеми святыми сподобимся прославляти в Троице славимаго Бога, Отца и Сына и Святаго Духа, ныне и присно, и во веки веков. Аминь.